

19. oktober 2009

UKA2009/98

**Meeqqanut tapiissutit pillugit Inatsisartut inatsisissaattut siunnersuut**

**pillugu**

**Ilaqutariinnermut Ataatsimiititaliap**

**ISUMALIUTISSIISUTAA**

**Inatsisissatut siunnersuutip aappassaaneerneqarnerani saqqummiunneqartoq**

Ilaqutariinnermut Ataatsimiititaliap sularinninnermini ukuninnga inuttaqarpoq:

Inatsisartunut ilaasortaq Debora Kleist, Inuit Ataqatigiit  
Inatsisartunut ilaasortaq Jane Petersen, Inuit Ataqatigiit  
Inatsisartunut ilaasortaq Astrid Fleischer Rex, Demokraatit  
Inatsisartunut ilaasortaq Ruth Heilmann, Siumut  
Inatsisartunut ilaasortaq Naja Petersen, Atassut, sinniisussaq

UKA 2009-mi ulloq 2. oktober inatsisissatut siunnersuutip Inatsisartuni  
siullermeerneqarnerata kingorna Ilaqutariinnermut Ataatsimiititaliap misissorpaa.

**Apeqqutit**

Apeqqutit arlallit akineqarnissaat pillugu Isumaginninnermut Naalakkersuisoq  
Ilaqutariinnermut Ataatsimiititaliamit qinnuigineqarpoq. Ilaqutariinnermut  
Ataatsimiititaliap apeqqutaasa nuutinneri Isumaginninnermullu Naalakkersuisup  
akissuteqaatai isumaliutissiisummut matumunnga ilanngussatut ilanngunneqarput.

Akissuteqaatit tigusernerat Ilaqutariinnermut Ataatsimiititaliap uppersarpaa.

## **Siunnersuutip siunertaa imarisaalu.**

Inatsisissatut siunnersuut ilaatigut UPA 2006/68-mi 2006-mi upernaakkut ataatsimiinnermi akuerineqartumik aallaaveqarpoq.

Siunnersuummi meeqqanut tapiissutit ingerlaannartumik pisariinnerusumillu tunniunneqartalernissaat siunniunneqarmat Ilaqutariinnermut Ataatsimiititaliap pitsaasutut isigaa. Meeqqanut tapiissutinik kingusinaartumik qinnuteqarneq qinnuteqanngivinnerluunniit pissutigalugit innuttaasut meeqqanut tapiissutisinnissamut pisinnaatitaaffeqartut annaasaqartarnerat Isumaginninnikkut Naammagittaalliuuteqartarfiup suliaatigut ilisimaneqarput. Naak suliat taakku qanoq annertutiginersut Naalackersuisut ilisimaqqissaanngikkaluaraat meeqqanut tapiissutinik pisinnaatitaasut tamarmik meeqqanutt tapiissutinik pisarnissaat qulakkeerneqartariaqartoq Ilaqutariinnermut Ataatsimiititaliaq isumaqarpoq.

Meeqqanut tapiissutit qaammatikkaarlugit tunniunneqartalernerisigut meeqqanut iluaqutaassasoq Ilaqutariinnermut Ataatsimiititaliaq isumaqarpoq, meeqqanummi tapiissutit tamanna siunertarimmassuk.

Aningaasanut inatsimmi meeqqanut tapiissutinut aningaasaliissutigineqartut malinnaavigeqqissaarneqaaqqullugit aammalu inatsisip ukiup ataatsip atuutereernerani inatsisissatut siunnersuut nalilivigeqqullugu Isumaginninnermut Naalackersuisoq tassunga ilanngullugu Naalackersuisoqarfik kaammattorneqarput. Matumani siunertarineqarpoq inatsit ingerlalluarnersoq nutaamillu iluseqalernermigut naapertuuttuunersoq paasissallugu.

Naak meeqqanut tapiissutit tunniunneqartarnerat ingerlaannartussanngoraluartoq, § 9-mi siunnersuut naapertorlugu paasissutissiinissamut innuttaasut pisussaaffiat inatsimmi atuuttumi atuuttoq ingerlatiinnarneqarmat Ilaqutariinnermut Ataatsimiititaliap naammagisimaarlugu maluginiarpaa. Tamatumunnga atatillugu Naalackersuisunut ilaasortap akissuteqaataani oqaaseqaatit Ilaqutariinnermut Ataatsimiititaliap tusaatissatut tiguai.

## **Allannguutissatut siunnersuuteqarnissamut pisariaqartitsineq**

Siunnersuutip 1. januar 2010-mi atuutilersinneqarnissaa Ataatsimiititaliap qularutigivaa taamaattumillu siunnersuutip aappassaaneerneqarnissaanut, taamaangippallu pingajussaaneerneqarnissaanut allannguutissatut Naalackersuisut siunnersuusioqqullugit ataatsimiititaliamit isumaqatigiittumit kaammattorneqarput, tamatumalu kingorna inatsit 1. marts 2010-mi atuutilissalluni. Taamaalilluni malittarisassanut nutaanut illuatungeriit tamarmik pitsaanerusumik piareersarnissaannut periarfissinneqassapput.

## **Inassuteqaat**

Oqaatigineqartut ilanngullugit siunnersuut akuerineqassasoq ataatsimiititaliap isumaqatigiittup inassutigaa.

Taama oqaaseqarluni Ilaqutariinnermut Ataatsimiititaliap siunnersuut Inatsisartunut aappassaaniigassanngortippaa.

Debra  
Kleist

Siulittaasoq

Jane  
Petersen

Astrid Fleischer Rex

Ruth  
Heilmann

Naja Petersen,

Knud Kristiansen sinnerlugu

[Ilanngussaq 1](#)

[Ilanngussaq 2](#)